

程

右晉太傅南郡公謝安字安石書六十五  
字四角開元小璽御府書也永存珍秘印  
入唐相王涯家翰林之印建中御府所用  
更兵火水土之劫者八百年歷代得以保  
之必有神護元祐中見晉十三帖於太師  
李瑋第云購于侍中王貽永家 太宗皇  
帝借其藏書模閣帖但取郗愔兩行餘王  
戎陸雲晉武帝王衍及此謝帖謝萬帖共  
十二帖皆不取摸版余特愛此帖欲博以  
竒玩議十年不成元符中歸翰長蔡公建



中靖國二年十月日以余薦好見歸余年  
辛卯今太歲辛巳大小運丙申丙辰於辛  
卯月辛丑日余生辛丑月丙申時獲之此  
非天耶米某記

跋褚遂良臨蘭亭序帖

右唐中書令河南公褚遂良字登善臨晉  
右將軍王羲之蘭亭宴集序黃素兩幅至  
欣字合縫用證摹本僧字果徐僧權書縫  
也雖臨王書全是褚法其狀若岌岌竒峯  
之峻英英穠秀之華翩翩自得如飛舉之

仙爽爽孤騫類逸群之鶴蕙若振和風之  
靡霧露濯秋榦之鮮蕭蕭慶雲之映霄矯  
矯龍章之動彩九奏萬舞鸞鷲充庭鏘玉  
鳴璫窈窕合度宜其拜章帝所留賞群仙  
也至於永和字全呈其雅韻九觴字備著  
於清標浪字無異於書名由字益彰其楷  
則若夫臨放莫推於魏薛賞別不聞於歐  
虞信百代之秀規一時之清鑒也 本朝  
丞相王文惠公故物辛巳歲見于晁美叔  
齋航去借自公孫辛巳歲贖於公孫瓌四

月二十二日寶晉齋舫手裝

跋李邕帖

右唐秘書監李邕字泰和墨蹟五十字易  
于呂文靖丞相家戶部尚書穉卿之孫端  
問有三帖第一帖有張子有字墨昏淡第  
二帖有縉雲字紙揭損此第三帖也精彩  
動人墨渴筆勁想運筆神助丁丑歲漣漪  
郡齋手裝

跋王右軍帖

右晉金紫光祿大夫右將軍會稽內史王

羲之字逸少王略帖八十二字入梁唐御  
府已見陶穀跋未全印及首半印曰永存  
珍秘唐相王涯印也自五代由陶入鄭郭  
亦見前跋至本朝入叅知政事蘇太簡家  
以墨妙筆精印蘇氏印國老武功圖書許  
國後裔等印國老才翁題爲辨舜賓子澄  
字道淵爲尚書郎孫之純純之妻李丞相  
嵩之後弟纁字彥益余姻家累年約爲購  
會余使西都帖自把至元約白金一笏當  
語宗正仲爰字君發遂力以十五萬購之

李不許且曰米亦姻家也即以十五萬取則以歸米迨使還如約然已使庸工拚背剪損矣昔梁武不收慰問帖唐文雖收尚別卷非慰問者此無正觀印但開元入御府尔古今印跋字備有傳授之緒吾閱書一卅老矣信天下第一帖也崇寧癸未季春九日玉堂竹齋手裝

跋晉帖

右本朝叅知政事蘇太簡所藏丙寅歲得于集賢國老孫秘閣子美子志東志東好

事與予家通書畫上著邳公之後四代相印蘇氏字印太簡被太宗遇使第諸國簿收書畫三等賜予甚多公卿之家無出其右此尤著名者紹聖中重裝翰林蔡元長既跋印以今翰林印副車王晉卿借去剪下元長所跋著他書軸乃見還其上故印存焉元符之元漣漪瑞墨堂題

跋晉唐帖

柳誠懸得大令書於太宗卷首連于大令之後可謂鑒矣復得右軍兩行反謂又一

帖是誤以義之為獻之又嘗見跋馮當世西昇經實非闕楮能書未必能別猶歐虞之於唐以書名天下魏鄭公無書名乃同褚遂良為正觀書證經正觀收者後世以為無偽識者以此為鑒癸未玉堂竹齋太常博士米某記

跋唐摸帖

開元御府大中建中弘文皆收搨黃金玉雖至寶器一毀之何代無工惟書落筆雖自再作亦不可復得搨而藏諸何陋之有

第一帖右軍閣帖有而無及謝侯字第二及末桓溫帖世未有別本漣漪郡嘉瑞堂元章記

淨手帖

某惶恐某幸稍出門仍意無外却尚恐異日因見所知而有隱情不告者將遂得罪左右故有露布仰浼台聽某平生喜書畫老親見聽直有不足至親授以首飾使購之嘗曰吾姓汝夢雙角人手携一軸物自空下故某每得一書初任客觀亦置于飯

机亦升輪手執之既窮其趣則以良日以  
紙鋪如書淨机上復用紙覆自紙間以皂  
筴灰水浸良久按覆紙洗之上紙爛即團  
以拂書塵垢一去然後露書除背紙去手  
澤有不可除者則又加團洗潔白而後止  
親用乳香作糊於百幅紙中心取剪四邊  
多近手有垢者而加背焉背訖即覆以紙  
加糊置一室中或綾錦皆洗軸安訖亦洗  
加跋紙取跋紙如背紙工畢入一奩中非  
明窻淨几輿見知客未嘗發每一發之文

犀瑩玳紫墨錦綺粲然溢目印以米姓秘  
玩書印文其所謂書者皆非前所閱可比  
也亦非今好事者所多有也今每示人者  
印以米姓清玩之印文待性暴不可告以  
情之密秘玩者實懼客以手指點衣袖印  
拂之偶一及之必洗書如初紙素不可數  
洗必欲戲一觸之是毀書也樞言康功志  
東欲觀而以情告見許遂敢出閱書之理  
洗二案相比某以紙繅鋪訖濯手親取書  
于奩中鋪展以示客客拱而憑空按坐從

容細閱其趨走于其前客去展其展客去  
卷其卷惟客命客據案甚尊其執事甚卑  
捨佚執卑者止求不以手或衣振拂之尔  
老母訓之不能改朋友誨之不能悛子弟  
諫之不能從惟蘇退舉曰君異日當以此  
迂要官某念要官可迂不可改心行年五  
十老倦則輸之御府必不在乙品公亦能  
屈意而一觀乎或於公齋或過弊齋得進  
退如理雖同子弟雜觀可也儻公不欲屑  
屑徇一蒙鄙陋之人則亦非敢曲煩台視

義之初月書之帖 懷素去夏帖 司空圖贈廣利哥 吳融贈廣利哥又博士帖 楊凝式晝夜帖又大  
顏魯公朱巨川語

而異日亦不敢受不告之罪某皇恐再拜

秘玩目

二王真蹟 陶隱居 智永 張九日

歐陽詢 顏魯公 懷素 司空圖

吳融 楊凝式 已上皆真蹟

梁臨樂毅論 唐模十七帖

荅人求寶硯帖

某再拜辱教須寶硯去心者為失心之人  
去首者乃項羽也硯為吾首誰人教唆事  
須根究然而復有一說徐熙梨花人多識



之請携去遍示識者若可當硯猶爲少存  
交情長年報荅必欲吾首亦不免永鎮烏  
江兩手揖下分付且只看成甚頭腦便希  
昆仲命駕早膳面議之也某再拜二龍賢  
友

求薦帖

某老矣先生勿恤廷議薦之曰襄陽米某  
在蘇軾黃廷堅之間自負其才不入黨與  
今老矣困於資格不幸一旦死不得潤色  
帝業黼黻皇度臣某惜之願明天子去常

格料理之先生以爲何如某惶恐

論書格

唐末書格甚卑惟楊景度行書與顏魯公  
壁拆屋漏同意王荆文公嘗謂此書意之  
所至筆之所止則已不曳以就長促以就  
短信之言也楚國米某

書祥瑞

黃帝以聖德治天下景星現其星如半月  
于中天自曉沒於南極帝堯百獸舞鳳凰  
翔廷生五色瑞芝民之子八九老人擊壤

而歌之帝舜慶雲現壽星在弧南極常以  
秋分之際現于景春分之旦没于丁天下  
承平萬姓樂業四海宴清

書呂溱事

溱字叔濟揚州江都人舉進士第一爲人  
精敏過人辯訟無不決初授將作監丞通  
判亳州累遷秘書郎直集賢院知蘇州未  
幾除度支三司判官同修起居注坐預進  
奏院蘇舜欽燕飲事出知蘄州復歷楚舒  
二郡叔濟平居不接士大夫留意於陰陽

文字精大數未幾拜侍讀學士知徐州上  
賜宴於資善堂上令內侍喻溱曰此會特  
爲卿設可盡醉也溱爲人簡倨每接賓客  
語不過數言而已時人目爲七字舍人性  
復驕豪後除龍圖閣訟無不立決 豪強  
懾畏之京師翕然稱之由此上益眷遇之  
厚因職事奏對上曰卿有疾色何耶對曰  
無疾上曰宜勉以近醫藥溱退甚自疑未  
幾疾作上章辭府事拜樞密直學士提舉  
醴泉觀使中使挾御醫診視賜三萬緡不

久而卒贈禮部尚書上手批付中書曰溱  
立朝最孤事君之節絕迹權貴故中廢者  
十餘年無人肯為達之者朕近親擢領要  
務頗著風績今忽淪亡甚可嗟悼可常賻  
之外量與優給及一行葬事官為辦集庶  
示將來以勵臣節元豐二年莫春之初米  
元章

題特古良醫妙技

華佗反死回生俞氏剖腹視病張氏隔膚  
透膜斯同道也

雜說

向與一相識書橫粘如是卷如何

許南叔善為令政聲流于隣壤

右軍快雪時晴帖真字在蘇志東房今居  
吳郡

張顛書賀八清鑒風流千載人也帖凡七  
紙蘇太簡家物液獻章子厚也

趙子立收筆陣圖前有右軍真并筆樣手  
勢圖後為章子厚取之使吳匠製甚入用  
今吳有其遺製近知此書在章持房下

晉畫古賢十人失其名在蘇太簡孫之顏位人間名畫也

李重光作此等紙以供澄心堂用其出不一以池州馬牙硃漿者爲上品此乃饒紙不入墨致字少風神也

樞密林文節觀吾家右軍書歎息久之一日云正觀印閣下有一軸相去五六寸乃是兩枚亦有相合者不相當也余聞之內慍不敢發視者月餘一旦忘之旣開皆不相當忽悟文節語即馳告公曰使君愈寶

重也

漣水陳生善作重山復嶺古木瀑泉近世  
尠及皆若真山不以雕鏤細巧爲美

吾老年方得琅琊紫金石與余家所收右  
軍研無異人間第一品也端唐皆出其下  
新得紫金右軍鄉石力疾書數日也吾不  
來果不復來用此石矣

漢畫龍已如今則劍飾所刻頭負者周龍  
也

蔣永仲作松贈曇秀吾題云撐雲旣竒屈

怒節更堅瘦怒爲露也

到任榜

朝廷深卹下民天性善良偶緣充役以期  
限罪破傷父母肌膚使秀民不得賓興于  
士於是以致差使量出錢而復其終身之  
役使百姓各各保完腎膚爲良善人飢荒  
則賑濟緩急闕乏則借貸與錢糴百姓無  
對本加倍利無流移鄉土而衣食結足國  
家不以張官設吏收給爲勞有凶歲倚閣  
赦放之恩是隱卹百姓德澤甚厚而百姓

於是時所宜興于行義不作姦究盜賊詞  
訟侵欺狡惡以犯官司至於證明理直則  
受杖破傷父母肌膚官司明則受杖無怨  
官司不明則雖直誤受杖比至別處次第  
論訴求直得直時父母肌膚已毀傷不可  
復完使一鄉人指爲至愚毀傷父母肌膚  
爲不孝論訟官司爲不良陷害他人爲不  
仁同鄉並舍結怨子孫相憎惡讎言不已  
爲不智辜負朝廷至誠惻怛愛民使趨善  
良之意僕甚惜之一邦有識四民之耆老

小學師長其助僕勸化百姓務尚和厚敬  
長老勤農桑救貧困養疎親省詞訟不欺  
善良不兼并窩藏盜賊姦究犯禁物保全  
父母肌膚爲良善民副朝廷至誠愛民意  
人情和厚然後感召和氣五穀豐熟字養  
蕃息

六順曉示

父慈謂爲人父伯父叔父愛姪如子愛他  
人之子亦如己之子  
子孝謂爲人之子孝於父母伯叔父母如

己父母見他人年高如父母者敬之如己  
之父母

兄友謂愛伯叔之弟如己親弟見他人年  
幼小者愛之如己之弟

弟恭謂事伯叔之兄如己之親兄敬他人  
年長者如己之親兄四海之人皆如兄弟  
姑仁謂爲人之姑世俗謂之婆謂之家已  
之女嫁他人家爲婦能愛養婦如己之女  
則婦心孝生得兒孫亦孝凌虐婦婦每生  
不孝心生得兒孫亦皆不孝

婦義謂感翁婆之恩夫之義夫歿不改嫁  
不招接脚夫只事翁婆如夫在慈養兒孫  
長成娶婦成家身却受婦兒孫供養  
右是人間六順之事能感召時和歲豐人  
壽長家道富子孫多或遇朝廷恩赦則當  
給賜粟帛或免身役旌表門閭其父不慈  
子不孝兄不友弟不恭姑不仁婦不義侵  
犯善良弃絕恩義是十惡五逆事便感召  
災害氣生年穀不熟家破人亡子孫滅絕  
於法則斬絞徒流之罪遇赦不原一邦有

識耆老後生好善之人務轉相訓告漸成  
忠厚以副朝廷德澤愛養元元之心

論書學劄子

時克書畫學博士

一太史星曆學小史書畫學自漢隸東觀  
稽用典籍甚多多太學所無欲乞倣古隸  
秘書省試經義附太學文藝並優取自上  
旨

一書學自祖宗朝向中正楊南仲周越咸  
以他官知判書石而已無職事自通  
聖上天縱悟筆一貫欲釐九格以造高古

緣珍圖名札必俟心悟筆隨乘興揆妙非  
可課程或撰到珍圖臨成名札必經天鑒  
以判工拙難從外勘當欲乞於內東門司  
具狀投進或非時宣取乞依太常寺例用  
榜子奏報

一如蒙改隸伏覩舊工部作七寺監內空  
一位乞充兩學諸色人等並乞依武學例  
秘書省錢如不足以太學錢通給  
右取進止

寶晉山林集拾遺卷第四





書